

## عهد

ما بين نظرة وحنين في البعد  
وحبل الود فجأة إتمدّد  
وأصبح يلزمه الإتينين  
بدون ما حد يظلم حد  
يشدوا الحبل م الطرفين  
بدون ما البعد يرخي الشد  
ويبقى الشد م الطرفين  
بنفس العزم نفس الأد  
ونفس الخوف من الفرقة  
ونفس الحرص على وصله  
ولا أبداً تكون فارقة  
مين منهم وصله وفين أصله  
عشان الوصل دا أصلاً

لا بإيديهم ولا منهم  
كما النار الى بتقيدهم  
وعاشقينها  
وحبل بيدمي في إيديهم بأشواكه  
ولسه بردو ماسكينها  
وتجرح مهما تجرحهم وحابينها  
ومادام الوصال إتمد  
تبقى اللعبة قلبت جد  
ولزم الوعد  
فنكتب عهد  
لا يطول الزعل بيننا  
ولا يدخل فراق بيننا  
وف عز المطر والرعد  
مفيش إنت وفيه إحنا

ونبقى بعض في المحنة

ونعند بس ع الايام

..ومش على بعض

ومادام الوصال إتمد

إكتب فى نهاية العهد

نكون أذّه

تطول بينا السنين فى العد

هيقوى الحبل

ونعدل كفة الأيام

ولو مالت..هنسند بعض